

Salids sur fossa:

GR 15-6-84

Blandina Olivi, Pazzallo/Sedrun

Ei va buca tgunsch da scriver in necrolog per in bien carstgaun che ins ha enconuschiu aschi bein, e ch'ei morts relativamein buca vegls. Dapi ils 14 da matg 1984 ruaussan sias rezonzas el santeri a Pazzallo (Tessin). Naschida ei Blandina a Cavorgia/Sedrun ils 1 da zercladur 1936 dils geniturs Hans Giachen e Turtè Monn-Beer. Ed ils 2 da zercladur, per il di da s. Blandina, han ins battegiu e dau ad ella quei num. Quella plontetta ei carschida, s'enfirmida e daventada gronda. Cheu a Cavorgia cun ses geniturs e fargliuns - ha ella passentau ina biala affonza, essend la pintga da diesch. Arrivai ils onns da frequentar las scolas, ha ella absolviu talas a Cavorgia, e suenter a Camischolas las secundaras. Cullas scolas ha Blandina buca giu de semudergiar, essend dotata cun fetg buns talents.

Inagada stada ord scola, eis ella scochemai serendida a Baldegg tier las mungias per far leu in onn scola da tenercasa ch'ella ha terminau cun in excellent examen. Da leu anora eis ella serendida a Lucerna, ed ha absolviu in cuors da malegiar. Da quei ha ella fatg savens diever en sia cuorta veta terrestre. E vesend sias bialas lavurs, savevan ins far nuot auter che smarvegliar sur da siu talent. E da leu anora eis ella serendida el Tessin, a Ligiaun, liug preferiu, che ei daventau sia secunda patria. Cheu ha ella adina luvrau sin differentes biros. Sco in bien carstgaun intelligent, bunta-deivel e honzeli che vuleva mo il bien als auters. A Ligiaun ha ella fatg enconuschientscha cun il giuven Aurelio Olivi. 1960 han els serrau lur ligia matrimoniala. Da quella létg ein sorti



dus stupents affons: in buob Rinaldo, ed ina mattatscha Nicoletta, che fuvan la legria dils geniturs e dall'onda Tina, che fuva leu cun els, fageva il tenercasa ed haveva quitau dils affons entochen che la mumma mava a luvrar.

Ei mava stupent. Legria e cuntentientscha regevan. In pèr gadas ad onn vegnevan ella a Cavorgia per passentar leu lur vacanzas en casa paterna, ch'els vevan acquistau entras cumpra. A Pazzallo havevan els

giu baghegiu ina biala casa. L'emprema viseta vegneva secapescha fatga ella casa s. Vigeli a Sedrun tier sia cara e buna mumma che va encunter ils navonta. Lu mavan els tier ils fargliuns che ein ils biars cheu ella val. Mo quella ventira ha buca cuzzau ditg. La buna mumma e consorta Blandina sto serender avon in onn el spital e sesuttametter ad ina greva operaziun. Da quella eis ella mai pli serestabilida.

E la via dalla crusch e dolurs han entschiet per nossa cara e buna Blandina. Mo cun exemplarica pazienza eis ella seremessa alla veglia dil Segner. Ella saveva che ses dis eran dumbrai. Buca dà capir che in aschi bien carstgaun sto - cun mo 48 onns - bandunar tut terrester e che sia cara mumma sto prender cumiau da sia feglia, la giuvna da diesch affons. Mals e dolurs che mo ina mumma senta, che ston sfraccar il cor. Cara e buna feglia e sora Blandina! Ti has finiu Tiu cuors terrester e gaudas la glisch eterna. Seregorda da nus tuts. Nus schein: Sin seveser puspei in di e tenin Tei en buna memoria

Tes fargliuns